

समां - 12:25 hrs.

<><><><><><>

MoS Special Campaign

केन्द्री मंत्री डाक्टर जितेन्द्र सिंह होरें सब्भनें मंत्रालयें ते मैहकमें गी आखेया ऐ जे सरकार दी एल्लै चलै करदी “स्वच्छता” महीम गी साल भर चलने आहली इक आदत जां गतिविधि च तब्दील करन तां जे हर इक देशवासी इस राष्ट्रव्यापी अभियान दा हिस्सा बनी जा। इस सलाना अभियान दे 5में संस्करण दी अमलावरी बारे सददी गेदी इक उच्ची सतह दी बैठका च बोलदे होई जितेन्द्र सिंह होरें “स्वच्छता” महीम गी पूरी चाली कामयाब बनाने लेई नमियें तकनीकें दे इस्तेमाल, समुदायें गी कन्नै जोड़ने ते कारोबारी इदारे कन्नै भ्याली दी जरूरतें पर जोर दिता तां जे कूड़े-कचरें दा बेहतर ढंगै सिर प्रबंधन होई सकै, टकोहदा करियै शैहरी इलाकें च ते सरकारी दफ्तरें ते इदारे च। मंत्री होरें सब्भनें मंत्रालयें च बेहतरीन तरीकाकार अपनाने ते महिलायें ते नौजवानें गी चेचे तौरा पर इंदे च शामिल करने दी जरूरतें पर जोर दिता तां जे इस महीम दे असर गी मता ते व्यापक बनाया जाई सकै। उनें समाज च स्वच्छता जागरुकता फैलाने च स्कूलें, कालजें ते स्वयं सेवियें दी भूमिका गी बी उजागर कीता।

<><><><><><>

Budget Prep

जम्मू-कश्मीर सरकारें 2026-27 आहले माली बरे लेई सलाना बजट तयार करने गितै इक प्रक्रिया शुरू करने लेई आखेया ऐ। आकाशवाणी दे जम्मू संवाददाता नै जानकारी दिती ऐ जे

खजाना विभाग नै एहदी शुरुआत करदे होई सभ्भनै प्रशासनिक विभागें, मैहकमे ते अध्यक्षें ते डी.डी.ओएं गी आखेया ऐ जे इस बारे प्रक्रिया गी तुरत प्रभाव कन्नै शुरु करी देन। बजट दा मसौदा 20-25 अक्टूबर तोड़ी तयार होई जाना लोड़चदा ते एदा मुकदा प्रस्ताव 30 अक्टूबर तोड़ी जमा करोआई दिता जाना लोड़चदा। जारी दिशा-निर्देशें च आखेया गेदा ऐ जे अनुमान ते कयाफे छड़े पुर कीती गेदियें असामियें लेई तयार कीते जागंन नां कि खाल्ली पेदियें ते डेपुटेशन आहलियें पोस्टें लेई। एहदे च आखेया गेदा ऐ जे बजट दे सरबंध्य च कम्म विधायकें, जिला विकास काउंसलें ते पंचैत मिम्बरें कन्नै सलाह-सूत्र करियै गै कीते जान तां जे संसाधन दे असरदार ढंगै सिर लॉटमेट ते बरतून जकीनी बनी सकै।

<><><><><><>

Rajouri Vay Vandana Card

समाज दे बुजुर्गें लेई सेहत दिक्खभाल च होर मती बेहतरी ते सहूलत बक्खी अगड़े बधदे होई, राजौरी दे जिला विकास कमीशनर अभिषेक शर्मा होरें कल टाऊन हाल च केन्द्र आसेया शुरु कीती गेदी “आयुष्मान वय वंदना” स्कीम तैहत कार्ड तयार करने दे कार्यक्रम दी शुरुआत कीती। इस स्कीम तैहत 70 बरे ते एहदे कोला उप्परली बरेसू दे सभ्भनै बुजुर्गें, भाएं उन्दी औंदन किन्नी बी होऐ गी ईलाज दी सुविधा पूरी चाल्ली मुफ्त उपलब्ध कराई जन्दी ऐ। इस मौके बोलदे होई डी.सी. होरें सभ्भनै योग्य लाभार्थियें दे नां इस स्कीमै तैहत दर्ज कराने दी जरूरत पर जोर दिता। उनें आखेया जे मैहकमा सेहत ते जिला अधिकारी एहदे लेई अनथक जतन करै करदे न तां जे सभ्भनै बुजुर्गें गी इस स्कीम दा पूरा -पूरा लाह हासल होई सकै।

बुजुर्गे इस स्कीमें गी असरदार ढंगे नै लागू करोआने दिये प्रशासन दिये कोशशे दी सराहना कीती ऐ।

<><><><><><>

GST Reforms

जम्मू-कश्मीर दी अर्थव्यवस्था गी बड़ा मता बढ़ावा दिंदे होई हाल च गै GST च कीते गेदे सुधारें च दस्तकारी, राई-बाई ते सैलसफा जनेह महत्वपूर्ण क्षेत्रे पर टैक्स दी दरें गी 12 फीसद शा घटाइयै 5 फीसदी करी दिता गया ऐ। इस पैहलकदमी कन्नै मुकाबलेबाजी च सुधार होने, रोजगार पैदा करने ते कारीगरें ते करसानें गी समर्थन मिलने दी मेद ऐ। पशमीना शाल, कालीन ते बसोहली चित्रकारी जनेहियां मशहूर दस्तकारियां होर किफायती होगन ते बजारें च उंदी मंग बी होर बधोग। एहदे कन्नै सैलसफा गी बी फायदा पुज्जने दी मेद ऐ।

<><><><><><>

Weather Advisory

जम्मू-कश्मीर आपदा प्रबंधन प्राधिकरण नै अनंतनाग, डोडा, जम्मू, कठुआ, किश्तवाड़, कुलगाम, कुपवाड़ा, पुंछ, राजौरी, रामबन, रियासी, साम्बा ते उधमपुर समेत जम्मू-कश्मीर दे केई जिलें लेई अज्ज संजा साड्डें 5 बजे तगर हाड़े दे खतरे दी चेतावनी जारी कीती ऐ। बसनके गी पूरी चाली सौहगा सतर्क रौहने दी सलाह दिती गेदी ऐ कीजे भारी बरखा दे कारण दरेयाएं च हाड़ आई सकदा ऐ, पानी दा स्तर बधी सकदा ऐ ते खलके इलाकें च पानी जमा

होई सकदा ऐ। अधिकारियें लोड़चदी सावधानी बरतने ते अपडेट रौहने दी सलाह दिती ऐ ते आपात स्थिति च फौरन 112 पर काल करने गितै आखेया गेदा ऐ।

<><><><><><>

School Closed

भारतीय मौसम विभाग आसेया भारी बरखा दी चेतावनी जारी कीते जाने मगरा जम्मू खिते दे सब्भै सरकारी ते निजी स्कूल अज्ज बंद न। स्कूली शिक्षा निदेशालय जम्मू नै विद्यार्थियें ते कर्मचारियें दी सुरक्षा गी यकीनी बनाने लेई दंऊ दिनें तगर स्कूलें गी बंद रखने दी घोषणा कीती ऐ। कल 7 अक्टूबर गी बी स्कूल बंद रौहगंन।

<><><><><><>

Cricket

महिला विश्व कप क्रिकेट च जंदी रातीं कोलम्बो च खेड्डे गेदे इक मैच च भारत नै पाकिस्तान गी 88एं रन्जे कन्नै हराई दिता। पैहले बल्लेबाजी करदे होई भारतीय टीम नै पाकिस्तान गी 248 रन्जे दा लक्ष्य दिता, जेदा पिच्छा करदे होई पाकिस्तान दी टीम 159 रन्जें पर आउट होई गई। इस जित्त कन्नै भारतीय टीम अंकतालिका च सब्भनें शा उप्पर आई गई ऐ। क्रांति गौड़ नै सब्भनें शा मतियां 3 विकेटां लैतियां, जिसलै के हरलीन देयोल दे 46 रन्ज ते रिचा घोष दे 20 वॉलें च 35 रन्ज नै भारत दी स्थिति मजबूत रखी, जिसी पार करना पाकिस्तान लेई नामुमकिन रेहा। भारत दा अगला मैच दक्खन अफ्रीका कन्नै वीरवारे विशाखापटनम च होग।